

沈乃文 主編

明別集叢刊 第三輯

第六十六冊

黃山書社



國家出版基金項目  
NATIONAL PUBLISHING FUND PROJECT


『十二五』國家重點圖書出版規劃項目  
2011—2020年國家古籍整理出版規劃重點項目

沈乃文 主編

# 明別集叢刊 第三輯

第六十六冊

黃山書社



(明)王穉登 著

# 謀野乙集十卷

明萬曆十九年刻本



王百穀先生謀野乙集序

濟北臨邑 邢侗

夫冥冥翥空尺一假其羽毛圍圍在淵八行  
鼓其鱗鬣飛沉匪郵傳之使禽魚眇含靈之  
性而能暢懷天末傳響絕微畸臣由之返國  
良用因而加飯斯之託寄顧不重哉若乃好  
綠于肺附誼重于修講勢出于蒼黃事關乎  
釁卻呼吸判乎頃憲占授次于言面非夫東  
里之博雅茂先之總粹鮮不錯雜其旨猥庫

其說啓友邦之反面動隣士之掩唇矣我友  
王百穀先生含貞蹈和苞素揚采去延陵之  
舊居僦伯通之故廡賡豐儉之穀玉耽洗礪  
之枕漱茹茨非貴而卿相造門逢掖本賤而  
鍾鼎佇席下帷方廣川之仲舒著書類君家  
之節信游道侔于太丘朋簪洽于蘓李竿牘  
靡夾日之間交訓盡四垂之遠矣竊見夫情  
至禮答裂素伸紙吐章陳文霞蔚河瀉學義  
冠于人倫言語妙于天下其或宰執方煥露

調咲于矜莊寒峻失職寓煦沫于嫺罵其或  
朱邱陽慕羅羅見其清疎熊轡委誠岳岳表  
其耿介其或閭門接壤賀吊別區生芻一束  
羊酒兩家沉痛極驩造微筆下其或疏屬密  
戚頭岑腹痛量水稱藥分甘餉鮮壹鬱三歎  
寄心行間其或良晨佳夕藉艸襲炬檢校鶯  
花指揮盧采倚馬露醉覩縷顏言其或方外  
名流域中胡賈彈指跡蘭閣之字橫書走迦  
葉之文其或蘭閨少婦桃葉小姬濡毫代金

剪之怨含辛報葦濤之錦大乃鉅幅小則掌  
蹠殷振金玉規矩騷雅摭若嚴霜之材婉如  
流風之雪磊砢無節目之累浩汗撒藩溷之  
障古則陳孟公今則王次公可謂異代齊軌  
書場文府均被談談之許者矣嗟夫在昔  
世皇楊用修氏纂輯清裁遂至洛陽長價雞  
林懸購彼猶無羽之衷此乃一狐之腋古謂  
蜀得其龍吳得其虎惜茲為喻未為評允也  
百穀友人韓君道亨廷尉世家代結王生之

戰桓譚玄賞獨信楊雄之草爰命剗剗副干  
郁氏道亨辭辨清發風氣適上余略得于其  
先大人茲特侈厥嚶鳴未際及其鴻匠云爾

三

乙集序

謀野乙集叙

蓋百穀先生曩遊京師實右相文  
榮公所羅致士公負宇內物望意  
不可一世而獨推穀先生每一奏牘  
輒稱賞且試事史曹紬繹金匱石  
室之秘藏為一代不朽事維時長  
安邸舍履跡常滿乃先生日縱飲

叙

燕市忼慨逍遙求古豪士如所為  
賣漿夷門其人與之虛左投契高  
歌擊筑抒其雄心而不可得竟謝  
事還吳中蓋環海內外靡不願  
識先生者而余從釋褐為令始觀  
先生於潞江為把臂交則晚矣先  
生上下六籍型範百氏語次毫端

各臻妙理勿論諸所論著洋洋灑灑歸於大雅間為余發揮家述陸離閎暢罕見其倫若觀市五都璠璣畢列至於八行之牘片詞隻語往往出之湯訓成于信腕自入要渺字挾風霜時或見投輒為同好索去以探之笥中無有存者其為人

叙

二

珍愛可知矣舊遊孝廉郝文升氏雅好斯道哀其尺牘付之剗剗而命其集曰謀野既叙之矣茲太學韓君從亨復為謀野乙集梓成而先生手以授余徵一言為嚆矢余雖不嫻於辭乎然竊有獲於其心者夫春秋以來辭命重矣而惟鄭之東

里氏稱焉傳稱東里有事於謀畫則載裨諶之野然於野則獲而于邑則否猶曰偶至且湛謀雖工止於創始先生以雕龍綉席之技得之倚馬或揮塵談天之事揚於今古立剖疑豫以謀天下何不獲者然而龍性未馴野鷗可狎即後車之

叙

三

載非其好矣世之學士工於用短或拙於見長讀是編者得無謂薄蹠柔翰未足標奇而不知先生胸藏萬斛大篇尺簡如湧泉碎金鹿非極軌蓋嘗鼎者取之嚙窺豹者識其斑孰是可以見先生乎非其全矣昔楊太史用修採先秦以下語裁為

尺牘而弇州先生復廣益之傳之  
詞林以為有談纖語家真一編斯  
集足敵之矣世豈無中郎必有酷  
嗜而秘之者寧余之阿所好也  
萬曆辛卯秋日天茁居士南詔  
胡士鰲誤

叙

四

謀野乙集卷之一

目錄

寄陳司寇

答朗初上足

答汪長文

與陳公衡

與劉忠父將軍

答王元楨

寄于公彞

與馮督學元敏

簡王司寇元美

與卓漱父

與鄭靖州

簡姜司寇

與趙宗伯汝邁

與余伯祥

與鄒祠部

答馬參軍用昭

謀野乙集

目錄一

寄周餘姚

答莊靜父

答陶文學

與華孝廉

與林天迪

與吳仲虛

與張別駕

謝張湖州

與馮元敏

答馬季聲

答喻參軍少極

與郭考功哲卿

答李都閫

與周餘姚

與呂祠部調父

與余次公

與屠長卿

與王蓀仲

與王季孺

與聞仲連

與汪長文

與楊伯翼

與李之文

與萬承夫

與唐止敬

答郁文叔

簡趙司成汝邁

寄邢直指

與顧中丞益卿

答楊去奢

與顧孝廉

與陳孝廉

寄徐襄陽

答朱在明

與馬用昭

與王鴻臚汝明

與郭考功

寄馬姬

與王太常敬美

與鄒祠部

謀野乙集

目錄一

二

答陳玉叔

寄顧仲修

寄王可大

寄吳少宰

寄陳黃門廣野

答余長君

答李吉士

寄黎司封

寄顧朗生

寄杜子庸

寄孫長卿

寄陳公衡

寄石公

寄龔嘉興

寄王司寇

寄陳司理師洛

答屠長卿

答梅禹金

與陳參軍

寄陶懋忠

與俞公子

與吳太學

與介師

與吳仲虛

與顧君錫

答凌使君

謀野乙集

目錄一

三

謀野乙集卷之一

太原王穉登著

長洲韓道亨校

寄陳司寇

明公官司寇不滿其德然此官尼父嘗爲之故  
知不辱乃公耳春來道體亨嘉舊德宿望之英  
將社稷是賴豈無明神呵護之哉穉登老且憤  
憤世緣日薄所須者一頃南山豆豈能復有雄  
心乎范光祿北征附問起居元日一詩題扇頭  
請正馳道紅塵差堪障面

謀野乙集

卷之一

答朗初上足

三奉手書兩奉新咏禪藻燁然如舍利毫光五  
采絢目阿師奇若此哉然以爲清江靈一之流  
則可耳成佛成祖皆不在是師乃不懼綺語障  
乎王生少年時作此伎倆今且折戟沈沙矣師  
以此慧力尋取本來面目豈不堪作天人師乎  
卽不然亦不失辯才天耳明年東渡請結支許  
之契

答汪長文

兩函念僕過殷何物王生遽入足下夢遂得比

於隍中之鹿耶扇頭新什清典沈森豈亞穆如  
之頌哉頃聞羣賢畢集湖上路車乘馬蹄轂交  
馳大類葵丘踐土之間諸侯爭盟迭霸束牲載  
書繁水捧劔未知牛耳先入誰手異時問西子  
不免嫣然笑吳下羣峰崕嶺不堪爲二雷廝養  
卒乃其人倫亦似之宜從者之不復西也明歲  
爲期者給我耳海錯之惠太多拜命惶悚

與陳公衡

子念言永嘉如天上頃者在明往無何而姚強  
二君復偕往始知曹君言無當而永嘉難不如

謀野乙集

卷之一

蜀道哉在明游以悅目二君游以餬口游道不  
同而皆取給於使君人生亦安能稿然一壑令  
妻子餒死然後爲高故知首陽於陵之夫誤人  
已甚趙陀魑結蠻夷君長耳猶能爲陸生治瘼  
使君之賢不難辦此第恐二君研食不逮陸生  
舌耕僕惜不能決黃河之流掛其舌端乃更請  
使君之舌爲曹丘矣

與劉忠父

明將軍握在明手當投轄井中不聽去然此黃  
鬚兒意在絕纓不在投轄戲下何以應之翠微

白雲政作醉翁麴生耳姚強二君裹糧爲永嘉  
游意不在龍湫雁蕩戲下借以頽頽俾不落莫  
古劉生能攫韓愈氏金而不能與人金今劉生  
雖不惜金金自不受劉生故不攫亦不能與與  
人金不若與人舌之惠廣願戲下無橋然此舌  
答王元頑

布衣之士輕如流塵不得居間力徒多損牛酒  
大爲魯連毛遂田光侯監門諸公所羞乃故人  
來自千里未能握手談契濶俗狀可知足下文  
如雉頭集翠之裘而以僕言序者是綦縞旃毳  
袖之也雖然敢不以蠅翼附驥尾乎雞黍奉享  
從者禽聲松籟差堪侑食足下亦可蚤臨遲則  
傖父輩塞屋下矣乞攜郎君至當一德星僕亦  
出兒曹下食

寄于公彞

六寒暑不見公彞公彞無恙吳下阿蒙非復往  
昔僕衰老憔悴頗似庾子山暮年善病阨然又  
似馬卿居茂陵也憶辛巳之歲會于金城者二  
三君如恩公覓蒲團脩淨業白仲朱汗淋漓滿  
髯然不免破轅異父文度及足下姓名上公車

輒報罷鄧汝孝青袍尚掩脰張雲南山頽木壞

天喪國寶又不勝開篋之淚僕弃諸生修頭陀  
行乃有三孫目前不落莫兩兒臺試不能取高  
等日在崦嵫不能俟其晚成一小女郎解人意  
娟好明慧能代伏勝授書五山之駕不免小淹  
然已擇一東床兒更五六年可覓禽夏乎汝孝  
稱郎君如謝庭芝蘭里門待此益高僕聞則喜  
欲舞且咲吾兒鼠犢哉今歲游金陵桃葉老姬  
如申公巫臣妻雞皮三少王生頂禿然若婆羅  
門豈堪復言擲果時事亟返輪却走猶恐瓦礫  
盈車也

與王元美

王君元頑楚材之甲門下高其品日當不脛而  
走矣頃來薦士于門下其踵相續瑯琊公腹如  
溟渤何所不混涵此王君乃十尺紅珊瑚請舉  
鐵網收之若僕瑣瑣僅供石家如意耳

與馮元敏

阿蘭若中僅一促鄰坐上客高談仁義僕竦然  
却走矣門下超超玄箸何庸此輩啼煙嘯雨耶  
霜寒籬菊頽盡空齋蕭然憶孤山三竺之間丹

楓若錦趣衰作游計糗稍具卽行矣郭考功以書索卷者再門下請竄易二三言核其事無若呂不韋懸書國門一字千金不許更也

與卓漱父

腐儒之殄以供上客令僕馬不飽爲東道之羞甚矣遠人慕履日尋戶外欲出郊從諸公游邈不可得酒壚之畔隔越山河何必作吏能銅人哉青翰且未東終當畢此願耳尊委一一題上但缺代作一篇捉刀床頭久不爲此足下幸無令王生爲牛後乎季常風神朗朗故當在絳帳謀野乙集卷之一五

白眉之間因足下復得一雋矣

與鄭靖州

靖州之拜不足爲門下榮政府謂此邦炎徼猺犍夜郎之與鄰蠻情鬼俗蕃漢雜糅非鄭先生金口木舌不能令其丕變耳承謨暨子昏庸驟嘗祭酒公三尺微門下之力幾不免教刑然家兄聞而失匕箸矣救親徐君履道新授監州乃獲執鞭於鄭先生先生有意僕當不蔑此君然徐故長者庶幾仰贊休明第不無吳兒憨緣慙或更得門下相憐耳病起畏遠行不能送從者

石頭城下別財一念及不勝數日作惡矣

與姜司寇

姜先生一言重若千鈞大黃弩何物承謨乃爲緩頰非夫所謂鼯鼠而發機者哉不拜大司成罪復不淺微門下者魚肉矣奴還而知司寇公之有大造於是兒也其施及不肖者寧但屋之烏而已耶然曰歸曰歸杳莫可望卽家大兄從此瘡矣家兄卽病不肖豈獨安然無已請稍屈司成三章以全王生二口者在門下爲德而卒之耳

謀野乙集

卷之一

六

與趙宗伯汝邁

以小子承謨之故妄然乞憐於長者乃聞不拜大司成不任啞然是兒也非夫所謂未至乎孩者耶苟其魄不褫而安得若此得免掠笞已幸望蜀之謂何而尚敢以請有如門下汪然萬頃乎黃口匹雛安足問卽是兒刀頭可卜穉登皓首伯兄藉此善飯無恙矣

與余伯祥

不肖之不妥干人也盖余先生能諒之頃者以猶子承謨之故而干先生先生答幼安書愛及

其烏矣是兒乳臭不足備門闌之厮乃不拜司成公此其入井之赤子耳不然豈有北面執經之地而堪酈生長揖哉微先生之德疇令祭酒公釋然是不幾楚纍耶僕亦安忍坐視家大兄之羸甚乎先生幸惻然此言僕免向隅而悲矣

### 與鄒祠部

八行勤重更聞寵及承謨僕屐齒且折於是兒矣典午老姬門無車馬蕭然如秣陵秋色二三故人佐以赤亥使買一廬若蝸牛者傍水竹之間不落沙叱利手中幸耳此烏足當阿嬌金屋哉奈何吠聲射影日相尋不休微門下護視之琴可變而鶴安能免烹乎門下無然以頭陀此言爲破戒蓋游戲三昧之云爾矣

### 答馬用昭

叅軍衙益寔甚乃承謨至而四簋燦然此不侵足下五斗耶是兒以不拜司成故不得放歸不歸何害誠不忍家兄念子羸如季孺耳姜先生乃肯爲是兒居間微足下曷以得此此兒不還僕終不免西行病夫雞骨柴然而令杖馬箠碌碌黃塵中用昭足下能不閱我

### 寄周餘姚

姚江丘壑之美甲於東南以風流明府蒞之政可一縣栽花耳朱叅岳過郡時首以門下爲托此公談姚江之政不減中年單父乎介師來述近狀甚悉彈琴之室能著一比丘非周郎無此致矣聞士莊靜父才清行潔素心人也今方游會稽客陳司理以書乞門下爲臨叩卽程鄭富人可壯其豪矣第不知誰家少婦新寡乎使綠綺不無聊哉

### 答莊靜父

足下客也乃婁出苞苴不倒行而逆施乎使者至承旅况甚適雲門禹穴以教以游綠水蕩漾清猿啼客子樂而忘歸矣顧曲周郎爲茂宰從者請一過其邑中當今日往朝相如也朱叅知不通桑梓僕此書以代樊舞陰龍盾耳

### 答陶太學懋謙

病後筆札填委漫爾酬應政若都市餅肆旋蒸旋賣噉者不知其無味日聚其門所謂以耳食而非以口食耶餅肆得錢盈撲滿乃更咲噉者不知味也僕視足下將無類之乎周郎入楚誠

浪游當以何時還還則持大斗觴之并祝其年  
與至後日俱長耳蟠桃一花一實皆隔三千歲  
事甚渺茫不若萱草宜男易種僕與諸君當各  
贈以一枝

與華孝廉

傳成而欲躬請門下也一刀西征值朱叅知於  
洛社還矣還卽趣衰游武林歸當過長至恐愆  
公家寃宥期留付門闌之廝俟從者至立授之  
僕拙於文不如鳩也鳩猶能擅鵲之巢僕則何  
有政恐門下報劉之情十不得一耳

謀野乙集

卷之一

九

與林天迪

客歲爲別憶在九之日以虎丘爲龍山馬臺綠  
酒黃花錯以紅粉於是公子不知一石之盡也  
僕夏秋之間二豎爲祟幾委頓矣不圖更生  
卽生耳無生之樂寧有髯戟如而俛首事雕蟲  
以供吉凶賓嘉終日兀兀不當五斗長安米與  
二頃洛陽田烏得不爲室人交謫乎今年九日  
風雨蕭然不知足下共何人把菊還憶王生無  
又安知王生瘦於菊也遠書珍重捉筆以序瓊  
枝錦龍文而襲襲之人人爭欲覩錦必且層舌

駢口詛僕是僕此序旣災瓊枝且自災耳

與吳仲虛

更生之身未能遽捨且從石公佞佛山中須作  
五日游然後買輿入錢唐郭訪足下足下且勿  
入山僕屏屨藜杖以事躋攀東林西寺莫有定  
蹤如不信僕言而漫然命駕當令從者惆悵雲  
深不知處耳虞初志序錄成奉覽不堪解人願  
安得說詩如匡鼎耶仲權未歸否請寄聲王生  
已序乘谷矣

與張別駕

謀野乙集

卷之一

十

自菁山太史家衝風入貴郡長年指幾墮矣泊  
舟慈感寺下若窮猿奔林以沙彌蒲團爲挾纈  
四體皆木僵旦日請謁使君衙醉烏程二家酒  
醺然乃解維抑別駕公美若醇醪恐不煩綠樽  
然後沈湎不腆致記曹猶是首荷拌中風味耳

謝張湖州

昨者步屨造使君署中肩鐫嚴甚禰生之刺莫  
可投悵然而去偕一二沙門入飛英蘭若見閭  
妃造石宰堵波雕鏤如絲髮蔡元長題釋迦殿  
榜書法甚豐美若歐率更下馬讀華山碑躊躇

不能已歸則使君見尋不值復損臺饋隆然正  
堪三日醉飽何敢更煩供具哉晨起欲謁謝恐  
五馬公出坐廳事不可曳長裾往來留一童子  
跽而請罪便移舟出東郭明年春水進龍衣當  
屬使君行否行則停轅半偈牽松下轆轤汲新  
泉驚虎丘旗槍以七盃奉供當烹羊炮羔耳

與馮元敏

襍被靈隱山樓者十夕以管屨叩杖邀南北二  
峰之間潺湲翠微已得十五歸而取道菁山至  
日坐范祭酒齋中蒼弁道場之雪皎然在目此

謀野乙集

卷之二

十一

地山川之美不減若耶雲門惟烏程二家酒濁  
如潼耳如蜜纔飲半升令人飽欲死不知當時  
何由得名耳還家不弛擔便走毘陵歸則請謁  
門下門下許郭考功改易讚語定已輟草有便  
人入秣陵倚馬而待卽未及風構不妨倚馬應  
之也

答馬季聲

入夏而病入秋而愈蓋自結髮以來未有伏枕  
三月如今歲者也季聲足下僕且憊矣不龜手  
之藥以爲泝泝統已耳足下去而取裂土之封

矣必假年而可哉四月游秣陵作舞裙歌扇因  
緣十月游武林作佛燈禪榻因緣還家遂逼歲  
除又作迎儺媚竈因緣此微塵世界中不堪游  
戲營營蝸角蚊眉間不勝自苦何爲乎僕不能  
蕩漿武夷與足下之不能躡屩虎丘也互爲解  
嘲畧相當乃足下必欲以名取而東是題橋棄  
繻之言與累糧命駕者河漢矣

答喻參軍少極

今先司馬之有遺愛於東人也蓋其棠至今猶  
未翦焉餘澤汪然以及門下門下任子如條侯

謀野乙集

卷之一

十二

參軍如鮑照才情風貌爲一時人倫之冠則豈  
非于公之後復有定國乎僕雖未獲執鞭其得  
自用昭口實者不勝同時之幸矣高篇遠貽若  
金膏水碧塞目奇珍此猶未足益以篋實累累  
僕誠不知所爲報也門下過聽用昭之言而好  
僕是葉公之好龍與燕人之好駿乎政得其皮  
骨耳以爲能噓氣成雲躡流星而逐馳電者烏  
有哉此不僕負用昭用昭負門下耶希雖救不  
敢竊享結束以授記曹請秘之勿示秣陵詞客  
俾咲王生老且禿也

與郭考功哲卿

承謨更得蜀敢忘使君之隴哉馬家使乎述使君雙瞳炯炯如寒星政堪山公藻士耳都人望考功先生若清流明鏡然當今神姦魍魎不能遁藏耳病起謁天竺大士武林幾作并州歸覓小馮君不得卷中詩請俟來年有如更緩當踞而乞之以報

答李都閫

病起佞佛留武林踰十日乃不知明將軍已佩鵲印分閫此邦悔不造鈴下指點銀鉶索曲生

謀野乙集

卷之一

十三

耳古雋與辨疑並是人間奇書得披首簡如覩武庫矛戟森然遠書嘉幣而索不佞爲序豈不貽羞玄晏哉稍須過臘請畢黔驢之技謝材官藉庇良厚明將軍施及不佞者寧但九里已耶

與周餘姚

莊靜父請僕竿櫓爲介能倒使君之屣乎間者宿靈隱招提踰十夕與介師對佛火夜談輒及門下餘姚治狀可當河南吳公於是知周先生目無全牛也僕佞佛日甚築廣長菴於白馬澗上欲衣一衲老其中明州僧許送古世尊像一

軀遣僮子往載出使君境中乞戒長年刺蜻蜓舟相送此舟遂成法棧矣

與呂祠部調父

從者入吳門重損嘉貺僕病不知人蓋茫然也後起而覓門下解維東者兩哉生明矣陽月之季謁大士而游武林乃聞太君仙逝客邸乏生蜀不能涉江奉弔歸則遣廝養持瓣香致總帷素車之期請俟獻歲剡溪積雪苦廬夜寒禹廟清猿與孝子悲號相和有相國之黃髮在則門下安得不抑損哀毀以爲生者慰耶

謀野乙集

卷之一

十四

與余次公

僕大病乍起謁天竺大士留武林十日錢塘細流清淺乃不能褰裳東涉以匣中魚腸掛文敏公隴樹但有太息而歸耳遣一廝束生芻往告守冢戶俾焚之隧道白楊悲風代王生一慟也東湖別墅之間高臺曲池皆無恙公子宜加葺治以待化鶴歸來但言雙袖龍鍾矣

與屠長卿

從者以八月游武林觀浙江潮乃去詞客酒人從之者輜輶如雲素車白馬銀山雪郭之奇差